

## **Mirsad Hadžikadić:**

Brčko je bilo zaista interesantno. U četvrtak smo saznali da su vlasti u Brčkom rekle da neće odobriti naš zahtjev. U ponedjeljak smo poslali zahtjev Policijskoj upravi. U utorak su oni to prosljedili kriznom štabu kako bi ih pitali mogu li nam odobriti zahtjev. Gradonačelnik predsjedava tim odborom. U četvrtak smo primili telefonski poziv kojim su nas obavijestili da neće dopustiti protestnu šetnju. U četvrtak smo takođe primili pisanu izjavu od kriznog štaba, gdje su naveli da uvode nove mjere za Brčko Distrikt, kojima ne dozvoljavaju okupljanje građana, počevši s tim mjerama u ponedjeljak. Naša protestna šetnja je najavljena za subotu, što je prije ponedjeljka. Oni su takođe preporučili da sva okupljanja bilo kakve vrste, uključujući vjenčanja i bilo šta drugo, budu otkazana. To je bila preporuka, a od ponedjeljka bi to bila zabrana. Zatim smo primili telefonski poziv iz ureda gradonačelnika, kojim su nas informisali da neće dopustiti protestnu šetnju tako kako je planirana. Tražili smo pisanu izjavu, i tu izjavu smo dobili u petak, gdje je u osnovi navedeno da krizni štab kojim predsjedava gradonačelnik neće dopustiti održavanje protesta, što direktno krši Uredbu odnosno mjere koje je izdao krizni štab kojim predsjedava gradonačelnik, a gdje se navodi da je to dozvoljeno ali oni preporučuju da se to ne radi, a ne da je to naredba i da se to ne može raditi. Mogli su jednostavno reći da primjena mjera započinje sutradan, ali ne, oni su rekli da nova Uredba stupa na snagu naredni ponedjeljak. Bilo kako bilo, te večeri smo održali sastanak Upravnog odbora Platforme za progres koji mi nazivamo Predsjedništvo, na kojem smo raspravljali šta da radimo i da li da jednostavno otkazemo događaj. Te večeri smo takođe imali skupštinu za regiju u kojoj se nalazi Brčko Distrikt, kako bi se uspostavila organizacija za cijeli Distrikt. Odlučili smo da odgodimo skupštinu za narednu sedmicu, i da ona bude virtualna, ali za protestnu šetnju smo odlučili da ju ne otkazujemo nego da ju učinimo virtualnom i da zatražimo da nam se ljudi pridruže u online protestu. Zatim je neko iznio prijedlog da se prenos zapravo napravi iz Brčkog, odnosno da ja odem u Brčko i da pročitam naše zahtjeve iz Brčkog, za što sam rekao da je u redu. Iznenada su svi željeli da se organizuju i govorili su da i oni žele ići. Otišli smo tamo u petak i nismo održali konferenciju za medije. Tražio sam mjesta u Brčkom gdje imam dobar signal za direktni prenos na Facebooku iz Brčkog. Tako smo usred noći hodali gradom, tražeći kafić koji ima najbolji signal. Jer, ako ste u Brčkom, nema svrhe da budete u hotelu – i u Sarajevu mogu biti u hotelu.

Ljudi treba da vide da sam u Brčkom, pa to treba da bude napolju. Zatim smo otišli ispred gradske vijećnice, gdje boravi i gradonačelnik koji nam je dao ovu zabranu. U međuvremenu smo saznali da je on iz stranke koja je vodeća u Republici Srpskoj, pa su svi pokazatelji da ta odluka nije donesena u kabinetu gradonačelnika, nego na najvišem nivou te vodeće stranke u Republici Srpskoj. Sve upućuje na to. On ne može biti kontradiktoran svojoj vlastitoj Uredbi. Tako smo odlučili da prenos održimo ispred gradske vijećnice. Okupili smo se u 10:00 ujutro u kafiću u parku pored vijećnice, u 11:00 smo prešli u mali park ispred vijećnice, a u 11:55 smo započeli sa prenosom. U međuvremenu su ljudi iz lokalne organizacije došli da vide šta nam treba. Takođe su neki došli iz Bihaća i Tuzle, i donijeli su našu zastavu i banere na kojima je navedeno da je to protestna šetnja, itd. Ono što nam je zabranjeno je okupljanje u grupi preko 20 osoba. Zato smo imali 19 osoba tamo, i svi smo nosili maske i održavali razdaljinu od 1,5 m ili više. Imali smo zastave Bosne i Hercegovine i Platforme za progres, i osobu koja je to snimala. Dakle, imali smo mali program. Vođa regije Sava gdje se Brčko Distrikt nalazi je govorio o našim organizacijskim naporima i o činjenici da je šetnja zabranjena. Vođa lokalnog organizacionog odbora je govorila o njihovim aktivnostima. Ja sam govorio o stanju Bosne i Hercegovine i o našim zahtjevima, te smo dodali novi zahtjev Brčko Distrikta, koji je zaista relevantan za njihove građane. Oni su prisiljeni da se izjasne o državljanstvu entiteta uz državljanstvo Bosne i Hercegovine kako bi mogli glasati u jednom od dva entiteta. Zapanjujuće. Ostali građani Bosne i Hercegovine nisu izloženi takvim uslovima odnosno restrikcijama. Dok smo to radili, primijetili smo da se okupilo preko 20 policajaca oko nas. Zatim smo primijetili da nas snimaju i fotografišu. Zatim, kad sam ja završio, jedan od naših članova je recitovao poemu koja je zaista snažna. To je bio kraj programa. Čim smo završili program, zahvalio sam se svima što su tu danas sa nama. Oko 2,000 ljudi se pojavilo na online protestu, a taj prenos uživo je u toku naredna 24 sata pogledalo blizu 200,000 ljudi. Dok sam završavao, vođa policijskih snaga mi je prišao i pitao jesam li ja neko drugi, odnosno osoba koja je to organizovala na lokalnom nivou. Rekao sam da to nisam ja, ali da ne želim da on upadne u nevolje jer sam ja odgovorna osoba, pa sam ih pitao šta im treba. Ipak su uzeli njegove podatke, i tražili su ime, starosnu dob, broj telefona, ime roditelja, itd. Uzeli su moje podatke i od još 3-4 ljudi, pa su se ljudi jako uznemirili zato što nas zapisuju. Nije to bio pravi problem, ali su ljudi bili nervozni zbog toga što

nam uzimaju podatke i pitali su se šta se događa i odakle im to pravo. Mi smo snimali sve to i bio je to dio prenosa uživo. Snimljeni su i trenuci uzimanja mojih podataka. U jednom trenutku je vođa policijskih snaga primio telefonski poziv, i odgovorio je: „Hej šefe, nema problema, ovi ljudi pokazuju poštovanje i fer su tako da ne vidim nikakav problem“. I to je snimljeno. Bio je to poziv gradonačelnika, i znamo da je cijeli grad to gledao. U tom trenutku, on je rekao da nema potrebe ni za kakvo uznemiravanje, i zahvalio nam se na saradnji. Rekao sam da znam da oni samo rade svoj posao, i da znam da je od njega zatraženo da to uradi, da to razumijemo. „Vi radite svoj posao a mi radimo svoj. Ne biste baš trebali uzimati naše podatke jer nismo uradili ništa što je u suprotnosti sa zakonom ili restrikcijama.“ On je rekao da je tako ali da ipak održavamo proteste. Odgovorio sam da ne održavamo proteste nego da imamo 19 prijatelja i kolega koji su se našli tu zajedno u istom trenutku. Svi nosimo maske i nismo blizu jedni drugima, izuzev sada dok govorimo s njim jer nas on prisiljava da budemo jedno pored drugog. Zakazali smo protest uživo, i promijenili smo taj protest zbog nametnute restrikcije, ali smo morali početi online protest odnekle pa smo odlučili da dođemo ovdje, što imamo pravo uraditi. Rekao je da razumije i da je sve u redu. Tad sam rekao da oni rade svoj posao a mi svoj, i ne vidim nikakav problem, te da se nadam da razumiju. Dakle, vidjet ćemo hoće li biti pokrenuta još jedna tužba protiv nas, ali bilo je interesantno. Sljedećeg dana, glavni medij u Republici Srpskoj - Radio i Televizija Republike Srpske (RTRS) je na svom portalu postavio izjavu gradonačelnika Brčkog, koji nas je napao i rekao da smo održali protest iako je on to zabranio, ali on je ipak dopustio da to bude online. Kao da nam on može dozvoliti ili zabraniti da održimo online protest. Bilo kako bilo. Nazvao nas je *takozvanom* Platformom za progres, što ljudi rade kad žele da minimiziraju važnost nečega – oni koriste izraz „takozvani“. Zatim nas je u suštini napao da smo protiv Dejtonskog sporazuma, protiv Ustava Bosne i Hercegovine, jer problematiziramo koncept entitetskog državljanstva koji je zapisan u Ustavu i koji ne bi trebao biti dovođen u pitanje. U tom trenutku smo znali da je to zaista veliki problem, da smo naišli na nešto što je jako važno, pa ćemo razgovarati o tome. Sad u suštini imamo reakciju sa vrha stranke koja je na vlasti u Republici Srpskoj, i potencijalnu tužbu protiv nas od strane stranke koja je najmoćnija i koja je na vlasti u Federaciji BiH. To je dokaz sada da ljudi na vlasti u oba entiteta koordiniraju svoje aktivnosti jer su primijetili da građani slobodno izražavaju svoje

mišljenje, što predstavlja opasnost po njih. Dakle, mi smo u interesantnoj poziciji. Napada nas pozicija odnosno ljudi na vlasti, a opozicija odnosno stranke koje nisu na vlasti pokušavaju da nas nekako uključe da budemo dio njih. Trenutno smo tu. Odlučili smo da ne reagujemo na to uopšte nego da samo izignorišemo. On je jasno demonstrirao svoju nesposobnost da objektivno formuliše argument. To je režim koji se ponaša kao i inače, pa smo mi odlučili da to samo ignorišemo i nastavimo svoje živote. Danas smo, na moj poziv opozicionim strankama koji sam poslao juče, imali Zoom sastanak nekoliko političkih stranaka. Dakle, sedam političkih stranaka sastalo se danas putem Zooma, na našu inicijativu, kako bismo razgovarali o protestima. Naime, Predsjedništvo Platforme za progres odlučilo je da ćemo nastaviti sa našim protestima u Banja Luci, Zenici, Goraždu, možda i Bijeljini, i onda završiti u Mostaru i Sarajevu gdje smo i počeli. Rekao sam im da planiramo proteste jer uopšte nije jasno da li će izbori biti održani. Budžet još uvijek nije odobren, ali čak i ako bude odobren, imamo i mnoge druge zahtjeve kao što su situacija sa koronom i ekonomska pomoć malim preduzećima koja je bila neadekvatna, zatim nivo korupcije, nefer izbori, sumnjivi izbori te naša želja za održavanjem elektronskog glasanja, i tako dalje. Odlučili smo da ćemo održati proteste i da ćemo ih najaviti, i željeli smo to da uradimo 5. septembra, ali takođe smo rekli da ćemo pokušati da iskoordiniramo i ponudimo svim strankama opozicije da nam se pridruže. Zato smo sazvali sastanak sa strankama opozicije, koji je održan danas. Oni su se svi složili da bi voljeli da se pridruže, zasnovano na ovim parlamentarnim postupcima po pitanju finansiranja odnosno usvajanju ili neusvajanju budžeta te da li će biti održani izbori ove godine ili će biti odgođeni. Sačekat ćemo to, pa imamo još jedan sastanak zakazan za srijedu, ali svi su se složili da treba da protestujemo. Oni žele protestovati sa nama i da to uradimo svi zajedno, ne samo u Sarajevu nego i u drugim dijelovima države, u Banja Luci itd, gdje god da krenemo. Zatim smo sročili saopštenje za javnost, dogovorili ga i poslali, pa je nekoliko televizijskih kuća iznijelo informacije o tome. Sada dobijam neke zahtjeve za razgovore sa medijima, koji će biti održani sutra. Dakle, u suštini razvijamo strategiju. Mi smo dio ovih razgovora i na mnoge načine i upravljamo njima, o tome kako da se nastavi sa protestima. Nas sada vide kao one koji organizuju i koji smo udarna snaga ovih napora. Drago mi je što koordiniramo te aktivnosti sa ostalim strankama, tako da poruka bude udarnija i glasnjija. Mislim da Platforma za progres u ovom trenutku radi ono što je na početku rekla da će

raditi: promijeniti smjer diskursa i događaja u državi, te da radimo sve što je u našoj moći da poboljšamo političke, ekonomske i kulturne uvjete tako što jasno definišemo zahtjeve i tako što razgovaramo sa građanima cijele države putem mirnih protestnih šetnji širom zemlje. Drugačije su poruke i ideje koje su bar djelimično usvojili ostali politički subjekti, ponekad oni u poziciji, ponekad oni u opoziciji, te mislim da mi u tom smislu dajemo svoj doprinos promjenama koje su ovoj državi neophodne. Juče me je pozvao hrvatski član Predsjedništva. Sjećaš se da imaju tri člana Predsjedništva u Bosni i Hercegovini: bošnjački, hrvatski i srpski. Hrvatski član me pozvao da ga posjetim, pa sam to učinio. Otišao sam u Predsjedništvo i razgovarao sa njim oko 45-50 minuta. Zatim je po običaju profesionalni fotograf napravio fotografije našeg sastanka. Nakon toga sam primio poziv od pomoćnika člana Predsjedništva koji me pitao da li je u redu izdati saopštenje da smo imali sastanak na kome smo diskutovali događaje u Bosni i Hercegovini i izrazili svoju odlučnost da izbori u Bosni i Hercegovini budu održani i da osuđujemo napore stranaka koje pokušavaju da ugroze mogućnost održavanja izbora u Bosni i Hercegovini. Jedina primjedba koju sam iznio je ta da nisam želio da budu navedene specifične stranke nego da se navedu samo sve one stranke koje se suprotstavljaju odnosno stvaraju prepreke odluci da se kreira proces koji vodi odobravanja budžeta pa time i kreiranja mogućnosti održavanja izbora. Zamolio sam ih da ne koriste ime te jedne najveće stranke s kojom oni imaju najveći problem, i oni su rekli da nema problema i da će to izmijeniti. Međutim, naravno, nisu unijeli tu izmjenu. Međutim, našim ljudima je bilo interesantno da je jedan od tri predsjednika pozvao mene kako bi razmijenio mišljenja sa mnom, što je još jedno priznanje našeg rasta u ovom trenutku.

Taode sam imao online sastanak sa vođom Evropske komisije. Evropa odnosno Evropska unija ima vlastitog ambasadora, kao što i njene države imaju. Naš sastanak je trajao oko sat vremena, i tu smo razmijenili mišljenja. Ja sam imao određeni razlog: tražio sam finansijsku pomoć za jedan start-up koji će pokušati da uradi nešto kako bi naveo što je moguće veći broj ljudi da glasaju, nezavisno za koju stranku, da ih navede da glasaju, i treba im pomoć da to učine. Oni su osmislili interesantan elektronski uređaj koji bi bio korišten u tu svrhu. Međutim, on je iskoristio tu priliku i da me pita za moje mišljenje o događajima u Bosni i Hercegovini, pa smo razmijenili mišljenja. Nastavljamo i sa radom na kreiranju liste kandidata za izbore, ponašajući se tako kao da će izbori zapravo biti održani. Proživljavamo bolove rasta, gdje se bavimo ljudima i ponekad njihovim

egom, osjetljivostima. Pokušavamo dobiti najbolji mogući redosljed ljudi na listama jer zaista je bitno da li ste prvi ili petnaesti na listi. Obično ljudi sa vrha liste dobiju više glasova, i u slučaju Bosne, to se reflektuje na našu vlastitu procjenu tih ljudi, iako to nije uvijek slučaj. Dakle, mnogo je aktivnosti, gdje moramo da konsolidujemo liste, pa još uvijek pronalazimo prave kandidate. Takav je život. Činimo sve što možemo da se pripremimo za izbore, pretpostavljajući da će oni biti održani. Mnogi ljudi nam dolaze. Sve više i više nas prepoznaju na ulicama i ljudi žele da razgovaraju s nama i razmijene ideje. Nastavljamo sa svojim naporima da obezbijedimo finansije, jer potreban je novac za predizbornu kampanju. Vrlo je interesantno i dobra su i interesantna vremena. Zanimljivo je biti dio svega toga. Na mnoge načine mi smo započeli taj proces.

**Clark Curtis:**

Historijski, blago rečeno, iz moje perspektive.

**Mirsad Hadžikadić:**

Donekle historijski, u Bosni. Jer bilo da nam se to sviđa ili ne, mi smo već promijenili smjer nekih događaja i uticali na ostale. Dakle, u tom smislu, dio smo trenutnih događaja koji onda postaju dio historije, kao činjenica da su veliki protesti održani u Sarajevu prije oko mjesec dana. To je činjenica, i to će biti dio historije: da se jedan od najvećih protesta u historiji dogodio u Sarajevu tog dana, a jasno je ko je organizovao taj događaj. Znači, ne pokušavam se hvaliti, nego samo govorim da sam svjestan činjenice da postoji potencijal za promjene u ovoj državi, i mi činimo sve što je u našoj moći, a očito nismo jedini koji to činimo. Mnogi drugi pokušavaju da urade istu stvar.

**Clark Curtis:**

Ja ću se hvaliti umjesto tebe. Pokušavam da razmišljam o dinamici u budućnosti Platforme u kontekstu svega što se dešavalo tokom posljednjih mjesec i po dana. Počelo je tako da si dobio nešto priznanja, ali od nedavno si zaista na radaru. Samo ova posljednja sedmica pokazuje to: stranke opozicije dolaze k tebi i predlažu da se udružite i razmislite o svemu. Hrvatski član predsjedništva te pozvao... Mislim, to su stvari koje se prije godinu dana ne bi dešavale. Ali se dešavaju sada, i to mora da je dijelom promijenilo razmišljanje i dinamiku budućnosti, rekao bih.

**Mirsad Hadžikadić:**

Da, to je tačno. Čak ni prije šest mjeseci ne bih mogao predvidjeti da ćemo biti na ovoj fazi svog razvoja. Uz to se sve to dešava u vrijeme korone, što je još interesantnije i predstavlja veći izazov, pa mi ipak pronalazimo način da prodremo do medija, do vijesti, tako da javnost može da čuje o nama. Zapanjujuće je kako ljudi reaguju na nas ovih dana. Ljudi nam trube iz automobila na ulicama dok prolazimo. Često budem na telefonu i ljudi me zaustavljaju da mi nešto kažu. Postoji divan osjećaj uvažavanja i nade kod tih ljudi koji mi sami prilaze i ispričaju nešto pozitivno, što je jako ohrabrujuće. Radujem se izborima mada znam da će biti jako teško jer će se glasovi krasti više nego ikada. Uglavnom, moramo proći kroz taj proces i nastaviti vršiti pritisak na međunarodnu zajednicu da izvrši pritisak na lokalne političare da promijene Izborni zakon kako bi se omogućilo elektronsko glasanje, u kom slučaju bi se igra u potpunosti promijenila. Međutim, ova novopronađena čuvenost odnosno prepoznatljivost otvara nove mogućnosti djelovanja. Ali, znaš šta je interesantno - u mom prenosu uživo u nedjelju imao sam goste iz Brčkog, organizatore događaja, i u mom uvodu sam rekao kako je veliki znak našeg brzog rasta to što se dogodilo u posljednja 48 sata koja su prethodila toj virtualnoj protestnoj šetnji u Brčkom, kad smo bili u stanju da se organizujemo od trenutka kad smo primili prvo poziv a onda dopis kojim nam nije dopušteno održavanje šetnje, tako da održimo virtualni protest ali iz Brčkog, sa 19 ljudi koji su došli spremni, sa majicama, banerima i zastavama, na potpuno dostojanstven način, poštujući sve restriktivne mjere i pravila ponašanja. Privukavši tako pažnju i dospjevši u medije bili smo u stanju prenijeti svoju poruku, a nakon toga smo vidjeli da je jedna opoziciona stranka počela govoriti o problemu Brčkog na koji smo mi zapravo privukli pozornost, a to je obaveza da se građani Brčko Distrikta izjasne o državljanstvu jednog od dva entiteta kako bi mogli glasati na lokalnim i državnim izborima. Bilo je zaista zapanjujuće vidjeti tu sposobnost da se pređe sa ničega na zaista dobar odziv unutar samo 48 sati. To je, po meni, znak da brzo rastemo i sazrijevamo, te da se ne bojimo. Ljudi ne znaju šta da rade s nama jer ne igramo po pravilima koja su oni uspostavili, jer mi imamo svoja vlastita pravila. Sva ta pravila su zakonita, ali niko ih se prije nije dosjetio. I da, spremni smo da koordiniramo aktivnosti sa opozicijom, jer je u interesu svih da se izbori održe – svih na strani opozicije, a i nama treba pomoć svih ostalih da prenesemo tu poruku. Dakle, mi ne kreiramo političku

koaliciju, jer moramo nastupiti sami u ovom ciklusu izbora, da vidimo koliko smo snažni, da vidimo stepen te snage. Međutim, određene stvari su korisne svima nama, a to je da se održe izbori, da se održavaju snažni protesti, i da se vrši pritisak na stranke na vlasti da objave i dozvole da se izbori održe. Dakle, da, da, prije šest mjeseci ne bismo mogli predvidjeti ovu tačku u kojoj se trenutno nalazimo u političkom životu Bosne i Hercegovine.

**Clark Curtis:**

Možda je sljedeće pitanje osjetljivo, ali ipak ću ga postaviti. Kad je riječ o saradnji sa strankama opozicije, znam koji je tvoj stav jer si ga jasno iznio, a to je da im se ne pridružuješ, nego je to jednostavno mogućnost da se glasnije iznese poruka o zabrinutosti zbog izbora. Da li stranke opozicije zaista to razumiju, ili se u pozadini nadaju nečem drugom? Jer, ti bi im mogao u budućnosti predstavljati prijetnju, kako postaješ sve popularniji.

**Mirsad Hadžikadić:**

Pa, mislim da je oboje istovremeno. Razlog zbog kojeg nas pozivaju na saradnju je priznanje da možda posjedujemo određenu snagu, koja bi im mogla biti štetna na način da ćemo uzeti neke od njihovih glasova na izborima. Prihativši nas, oni se vjerovano nadaju da nas u jednu ruku obuzdaju i minimiziraju našu privlačnost, te zadrže dio svog glasačkog tijela tako što će reći da smo mi ionako s njima. Mi to znamo, i znamo da bi nam bilo korisnije da se držimo po strani i kažemo da nismo zainteresovani jer imamo svoj put i borit ćemo se protiv svih,. To je vjerovatno purističkiji pristup koji bi nam donio više glasova, ali istovremeno bi to moglo biti opasno stanovište u opoziciji, jer bi u natjecajima za pozicije gradonačelnika moglo omogućiti da pobijede kandidati nacionalističkih stranaka, prosto zato što bismo mi oduzeli određene bodove od druge strane, od opozicije. Mi to ne želimo, jer bi moglo biti loše za Bosnu i Hercegovinu, pa na neki način moramo da podnesemo žrtvu i kažemo da budemo odgovorni građani. Iako su naši razgovori jako srdačni, a nadam se i iskreni, i čini se tako, ipak znam da im je negdje na umu njihov vlastiti interes protiv našeg i da moraju uraditi ono što je najbolje za njihovu stranku. Dakle, mi smo u ovome zajedno jer smatramo da nam je u interesu da budemo zajedno, jer bi se na taj način mogli lakše izboriti da se održe izbori 2020. godine. Dakle, dobro si to rekao, to je dinamična i kompleksna situacija, i mi svi učestvujemo u tom plesu i pokušavamo da vidimo šta bi budućnost mogla donijeti. Moja jedina nada je da svi mi znamo i prihvatamo činjenicu da je



taj ples neophodan za dobro Bosne i Hercegovine, i da moramo da učinimo sve što se može učiniti da najbolji kandidati za građane ove države i za ovu državu budu izabrani na pozicije. Čini mi se da svi razumiju tu poruku, ne svi podjednako, ali sigurno bolje nego prije par mjeseci. Mi ćemo nastaviti da igramo svoju konstruktivnu ulogu. Naše namjere su jasne, očite, i otvoreno predstavljene ostalima i medijima, kao i našim članovima. Pokušavam da obrazujem naše članstvo da je neophodan određeni nivo koordinacije, jer naši članovi žele da nastupamo sami. Oni ne žele nikakve veze ni sa kim, jer znaju da su svi postali uprljani na nekom nivou. Samo se nadam da će svi biti dovoljno zreli da shvate da su određene stvari potrebne i da trebamo da koordiniramo određene aktivnosti a natječemo se u drugima, a onda kad svako od nas pokaže svoju snagu na izborima, onda će se vidjeti kakva koalicija se može formirati kako bi se imala većina na nivoima gradova, a sve kako bi se radilo u ime naših građana.

**Clark Curtis:**

Samo još jedno brzo pitanje, ako imaš vremena. Sve više ljudi vam nudi pomoć i pitaju kako mogu učestvovati i biti dio ovoga. Nije bilo tako davno od kad smo mnogo puta razgovarali o tome da ti ljudi prilaze i podržavaju ono što radiš, ali su se bojali da to otvoreno rade zbog posljedica koje bi mogli imati na svoj posao ili nešto drugo. Imaš li osjećaj da se to sada donekle mijenja kod ljudi koji ti pristupaju?

**Mirsad Hadžikadić:**

Da, zapravo imam taj osjećaj. Mislim da je to zbog snage i veličine protesta u Sarajevu, pa ljudi konačno shvataju da je ovo nešto stvarno, što ih ohrabruje da izađu iz svojih ormara i snažnije nam pokažu podršku. Takođe, mislim da vide našu upornost. Mnogima se ne sviđa činjenica da nam prijete kojekakvim tužbama odnosno sudskim postupcima protiv nas, što je dovelo mnoge na našu stranu. Vidjet ćemo šta će se desiti nakon ove policijske intervencije u Brčkom, ali drago mi je vidjeti da se sve veći broj ljudi osjećaju slobodno da govore s nama.

**Clark Curtis:**

Znam da je 2018. godine bilo vrlo ograničeno, kad sam razgovarao s nekim ljudima dok sam boravio u Sarajevu. Međutim, postojala je podrška, čak i gospođe koja je upravljala mjestom u kom sam odsjeo. Oni su podržavali ono što radiš, ali u to vrijeme su se bojali da to pokažu svojim glasom, jer nisu mislili da imaš šansu da pobijediš iako im se sviđalo to što radiš. Sad su

se stvari promijenile i ljudi više zapažaju da postoji mogućnost da budete izabrani na pozicije gradonačelnika i slične pozicije.

**Mirsad Hadžikadić:**

Da, potpuno tačno. Mislim da će biti mali broj ljudi u ovoj zemlji koji će nakon izbora moći reći da nisu imali pojma da Platforma za progres postoji i da smo dio procesa. Dakle, barem to smo uradili. Jedan od problema koji smo imali na prošlim izborima je to što pola zemlje nije imalo pojma da postojimo jer nismo imali pristup javnosti putem medija. Sada, dvije godine kasnije, ljudi znaju. Učinili smo dovoljno da svi saznaju, pa nas sad više nego ikad pozivaju čak i u medije koji su u javnom vlasništvu, što mi je šokirajuće. Barem je tako u Federaciji. Na nivou države nas još uvijek posmatraju na drugačiji način. Neki nezavisni kandidati za gradonačelnike i neke stranke nas pozivaju da sjednemo s njima i da ih možda podržimo. Bit će mjesta gdje ćemo dati podršku, ali ne svugdje. Još jedna stvar koju sam želio spomenuti ali sam zaboravio je to da smo nakon Brčkog ja i Mirzeta otišli u Srebrenicu, jer je kao što znaš bila godišnjica strašnih događaja u Srebrenici, genocida. Komemoracija je održana 11. jula. Željeli smo ići na Marš mira prije toga, ali je on odgođen zbog korona virusa, a traženo je da ne bude mnogo ljudi okupljeno na komemoraciji i zajedničkoj sahrani održanoj 11. jula. Odlučili smo da to ispoštujemo i da odemo tamo kad nema nikog drugog. Tamo je i izložba jednog od najpoznatijih bosanskohercegovačkih slikara, otvorena na mjestima u Srebrenici gdje su se ubijanja desila, ili gdje su ljudi držani prije nego bi bili odvedeni da budu ubijeni. Na putu iz Brčkog išli smo istočnom stranom Bosne da posjetimo Srebrenicu. Otišli smo u memorijalni centar gdje su sve žrtve ukopane. Proveli smo neko vrijeme tamo i sa organizacijom Emaus koja radi neke poslove u zajednici odnosno pomaže slabostjećim članovima zajednice. To je bilo prvi puta da sam otišao u Srebrenicu izvan vremena događaja 11. jula. Bilo je dojmljivo, moram ti reći. Činjenica je da je jako mali broj ljudi tamo, pa se osjećate kao da ste sami sa svima onima koji su izgubili živote. Onda vidite ostale koji tu šetaju. Jedna stara žena je bila tu, koja je očito izgubila mnoge članove svoje porodice. Kad uđete u memorijalni centar, vidite zid sa imenima ljudi koji su poginuli, a ona je išla od jednog imena do drugog, zastajući. Prošlo je još 4-5 ljudi, zastajući pored nišana, spuštajući ruku na kamen nišana i plačući. Bilo je zaista dojmljivo, kao da imate svoj vlastiti privatni trenutak sa poginulima. Emaus takođe organizuje kamp, i oni su

organizacija koja hrani mnoge i postavlja šatore i brine se za mnoge koji dođu u Srebrenicu na komemoraciju, ali i nakon Marša mira, tako što postavi šatore i pobrine se za njih na ostale načine. Oni takođe čiste memorijalni centar za taj veliki događaj odnosno za komemoraciju 11. jula. Dva člana Platforme za progres su im pomogla u tim aktivnostima, pa su nas pitali da li mi kao Platforma za progres podržavamo kandidata za gradonačelnika u Srebrenici, gdje su se sve probosanske stranke sastale kako bi kandidovale samo jednog kandidata, a mi smo kao organizacija podržali taj proces, pa je pitanje bilo da li ćemo zapravo izdati saopštenje za javnost kojim podržavamo tog kandidata. To je ubrzalo razgovore sa našim političkim savjetodavnim odborom po tom pitanju, pa smo odlučili da govorimo o Srebrenici na širi način odnosno kako možemo iskoristiti te strašne događaje kao način da iniciramo drugačiji način razmišljanja o prošlosti i budućnosti Bosne. Oprosti, bio je to jako dug odgovor na tvoje pitanje.

**Clark Curtis:**

Ne, ne. Sjajno je, Mirsade. Mogu samo zamisliti kakvo je tvoje iskustvo tamo bilo. Vidio sam tvoju sliku tamo na kojoj si sam pored zida, a koja mi je bila jako dirljiva.

**Mirsad Hadžikadić:**

Da, bilo je posebno.

**Clark Curtis:**

Da.